

# Ya'a tse'e je muto'k nak juu' ve'e je Pablo tyuknuja'yi je jaanchja'vivatajk jep Tesalónica

<sup>1</sup> Atse'e je Pablo, maat je Silas jets je Timoteo, máyam aatse'e je Dios ntuknyukexta je jaanchja'vivatajk juu' ve'e nay'amojkijidup jem tesalónicait kyajpun kajxm. M'ijttupe'e jem je Dios Tee' jets je Maja Vintsán Jesucristo jya'vin kajxmda. Je'e tse'e mkunoo'kxjadap jetse'e m'ijttinit je y'oy joot maatta.

*Je nu'ixvaatsun juu' ve'e pyaamdu je tesalónicait jáyuda*

<sup>2</sup> Nkukojsjip xa aatse'e je Nte'yam xa'ma kajx anañujoma miits kajxta, nnutsapkojtstupts aats miitse'e ku aatse'e ntsapkats. <sup>3</sup> Je Nte'yam, juu' ve'e nTee'imdup, jéjats aatse'e je'e vyinkujk nxa'majaa'myéts juu' ve'e mtoondup. Ax juu' tse'e mtoondup, je'ets je'e ve'e duyaknuke'xnatajkíp je tsojkun juu' ve'e mjayejptup jets vintso ve'e xjaanchjávada je nMaja Vintsánamda Jesucristo, nay ve'empa vintso ve'e to'k aaj to'k joot x'a'ixta ku ve'e myiinnuvat. <sup>4</sup> Utsta ajchta utsta tsá'ada, ooy xa ve'e je Nte'yam mtuntsókjada, nnuja'vipts aatse'e jets je'e ve'e mvinkoojnjudu. <sup>5</sup> Kux ku xa aats miitse'e nvaajnidi je oy kats je oy ayook, ka'a tse'e nvaajnidi tun je kats maatji, je Espíritu Santo je myakkin maatpa ve'e, je'e aatse'e xtukvinja'vi

jets tyúvam je'e ve'e je ayook juu' ve'e nvaajnjudu. Oj xa ve'e xnujávada vintso aatse'e njáyuva miits je m'ò'yin kajxta ku aatse'e n'ijt miits maatta.

<sup>6</sup> Ax mnu'ixvaatstu tse'e vintso aatse'e juu' ntuujn nkajts, ve'em ax jo'n aatse'e je Maja Vintsán xtukmutsajk; óyame'e je jayu ooy mtunyaktsaachpaatjidi, mkuvajktu tse'e je oj kats je oj ayook je xoojntkun maat juu' ve'e je Espíritu Santo mmooyjjudu. <sup>7</sup> Ax ve'em tse'e mnu'ixvaatsjidi je jaanchja'vivatajk pan pan jatye'e tsuunidup jem macedóniait y'it jootm jets yaja acáyait y'it jaat. <sup>8</sup> Ax ka jémjyap tse'e macedóniait y'it jootm jets ka yaajyap tse'e acáyait y'it jaat yaknujava je Maja Vintsán je kyats je y'ayook, ñuja'viduvap je'e ve'e je jáyuda oyjoma tsova vintso ve'e je Jesucristo xjaanchjávada. Ka'a tse'e y'ukvinkópkini jets aatse'e juu' nkótsut. <sup>9</sup> Je jayu xa ve'e viinm dumaajntyktup vintso aats miitse'e oj yakxón xkuvajkti ku aatse'e n'ijt miits maatta, myaajntyktuva tse'e vintso ve'e xvintsa'ki'atúvidi juu' ve'e ka je Nte'yamap jetse'e xvinja'vi'ukvaandi xvintsa'ki'ukvaandi je joojntyk Nte'yam, juu' ve'e tyúvam. <sup>10</sup> Nay myaajntyktuvaps je'e ve'e vintso ve'e x'a'ixta je Nte'yam je y'Onuk ku ve'e choo'nut jem tsapjootm jetse'e kyadaaknit. Je Jesuusts je'e ve'e, je'e juu' ve'e je Nte'yam yakjoojntykpajknuva ku ve'e y'uk'aa'k jetse'e xtuknuvaatsumda je makk tsaachpaatun juu' ve'e miimp.

## 2

*Juu' ve'e je Pablo tyoon jep Tesalónica*

1 Utsta ajchta utsta tsa'ada, mnuja'vidinup xa ve'e jets ka koojyap aatse'e n'ijt miits maatta. 2 Oyam aatse'e je jayu xyaktsaachpaaty jem filíposit kyajpun kajxm jets aatse'e jem nyakjomtuujn nyaktituujn, ax jo'n xnujávada jo'n, ku aatse'e nje'y joma ve'e miitsta, je Nte'yamts aatse'e je makkin xmooy jets aats miitse'e jeja numay tso'oxpajkpa akujk nvaajnjadi je oy kats je oy ayook. 3 Oy xa aatse'e nnujava jets tyúvam je'e ve'e juu' ve'e nvaajnjudu, ka'a aatse'e juu' nkats je ko'oy joot maat ukpu juu' aatse'e je jayu ntukvin'uu'mp. 4 Je Nte'yam aatse'e xtukkatajki ya oy kats ya oy ayook kux y'ixp je'e ve'e jets ntuump aatse'e juu' je'e ve'e chajkp. Ka ve'emaps aatse'e je jayu ntuk'ix jetse'e je jayu du'oyjávát juu' aatse'e ntuump nkajtsp, ve'eme'e ax jo'n je Nte'yam du'oyjávát, je'e pane'e aats ya nja'vin ya nvinma'yun dutuk'ixnajxp. 5 Ax jo'n xnujávada jo'n, ka'a xa aats miitse'e nvintaayidi nvinxoonidi ku ve'e nvaajnjadi je Nte'yam je y'ayook. Njuja'vipts je'e ve'e jets ka'a aatse'e ti nkajts juu' aatse'e ntukmeempákup. 6 Ni vin'ita xa aatse'e nka'ixta jets aatse'e je jayu xyakmájat, dumíitsada, duiijnkjáyuvada. 7 Oyam aatse'e xja'o'yixji jets aats miitse'e kun'amótudi je putajkin kuxe'e aats je Cristo je kyukátsiva n'it, ka'ats aatse'e ve'em ntuujn, nuu'k aaj nuu'k joot aatse'e n'ijt miits maatta, ve'em ax jo'n je ónuuk taak duyak'anuu'k je y'ónuk. 8 Kux ooy aats miitse'e ntuntsokta, je'e kajxts aatse'e nnyaja'viji jets ka je'ejyape'e nvaajnjadap je oy kats je oy ayook, nay ve'empa ve'e jetse'e nku'oo'kadat

ku aatse'e ve'em ntun. <sup>9</sup> Utsta ajchta utsta tsa'ada, mjaa'myejtstup xa ve'e vintso aatse'e ntuujn mpujk jóvum xaaj jóvum tsooj, ve'emts aatse'e ni pana miits nka'h'atsuux ku aats miitse'e nvaajnidi je oy kats je oy ayook.

<sup>10</sup> Mnuja'vidinup xa miitse'e, nay ve'empa je Nte'yam, jets pyaatyp y'akeeguij je'e ve'e juu' aatse'e ntoon nkojts jets je va'ajts joot maat aatse'e n'ijt miits maatta. Ka'ats aatse'e pan n'ituma'a jets aatse'e pan xtuktókinat otyía. <sup>11</sup> Mnuja'viduvaps miitse'e vintso ve'e nkojtsmákkidi jets aatse'e nuto'k nuto'k miits nyakjót'amájidi, ve'em ax jo'n je ónuuk tee' dutún je y'ónuk. <sup>12</sup> Nmunoo'kxtktu tse'e jetse'e ve'em mjoojntykadat ax jo'n duvinmachju jetse'e jyoojntykadat pan pan jatye'e je Nte'yam maat napyaa'jmjudup, je Nte'yam, juu' ve'e myaaxujudu jetse'e m'ijttinit jem kyutojkun jootm jets joma ve'e je myajin.

<sup>13</sup> Nkukojsjivaps aatse'e xa'ma kajx je Nte'yam ya'a kajx. Kux ku xa miitse'e x'amotunajxti je Nte'yam je kyats je y'ayook, ka'a tse'e xkuvajkti ax jo'n je jayu je kyats je y'ayook kuy'ijt jo'n, mkuvajktu ve'e ax jo'n je Nte'yam je kyats je y'ayook, ax je'emts je'e ve'e jye'e. Ax myaayp tse'e kuxe'e xjaanchjávada. <sup>14</sup> Utsta ajchta utsta tsa'ada, ku xa ve'e je mmukukajpun myaktsaachpaatjidi, ve'em tse'e mjaajttuva ax jo'n jyajtti je Nte'yam je jyayu juu' ve'e jem Judea, juu' ve'e to'k muk ijttup je Cristo Jesús maat, ve'eme'e jyajtti ku ve'e je myu'israeejlit jayu yaktsaachpaatjidi. <sup>15</sup> Je israeejlit jayu tse'e dukajaanchja'vidu je Maja Vintsán Jesús jetse'e duyakjay'oo'kjidi, ve'em ax jo'n duyak'oo'kti je Nte'yam je y'ayook

kojtsnajxpatajkta, xjomtoonduva xtitoonduvats aatse'e, cho'oxpajktupts je'e ve'e je Nte'yam jets pan pan jatye'e ka je israeejlit jáyuvap. <sup>16</sup> Kux ku xa aatse'e nmukotsta pan pan jatye'e ka je israeejlit jáyuvap jetse'e ve'em dujayejptinit je joojntykin juu' ve'e xa'ma kajx ijtp, ka'ats aatse'e xyakajtjava'anda, ve'em tse'e je tyokin duyakma'yi'ata'atsta. Ax ta tse'e tyukje'yjidini je Nte'yam je y'ejkun.

*Ku je Pablo duku'ixuvaannuva je jaanchja'vivatajk jep Tesalónica*

<sup>17</sup> Utsta ajchta utsta tsa'ada, ku xa aatse'e ntsoo'nni joma miitse'eda jetse'e je it ñajxy, óyamts aatse'e nka'ijt miits maatta, yam tse'e aats nja'vin kajxm m'ijtti, ooyts aatse'e njatuntsajk jetse'e nku'ixtat. <sup>18</sup> Janajkxuvaan xa aatse'e, ukpu jyatun'atsjya, je Pablo, may naxts atse'e njanajkxuvaajñ, ax je Satanás tse'e dukaxa'mayak'o'yip. <sup>19</sup> Miitsts aatse'e ntukxoojntktup jets aatse'e je majin xmo'oda, n'a'ixp xa aatse'e jetse'e n'ijtumdinit jem je Maja Vintsán Jesucristo vyinkojkm ku ve'e myiinnuvat. <sup>20</sup> Miitstats je'e ve'e juu' aatse'e xmooydup je majin jets aatse'e xtukxoondukta.

### 3

<sup>1</sup> Ax je'e kajx tse'e, ku atse'e nkoo'kmuténini kuxe'e ats nkanujava vye'na pan vintso miitse'e jemda, nnayja'vijuts atse'e jets atse'e ntaajñ jem aténasit kyajpun kajxm <sup>2</sup> jets ats miitse'e ntuknukejxti je n'útsamda je n'ajchamda Timoteo. Je'e xa ve'e je Nte'yam dumutoomp dumupajkp

jets aatse'e ntukka'amáy je oy kats je oy ayook, nkejxiduts ats je'e ve'e jetse'e makk aaj makk joot xjaanchjávadat je Jesucristo, <sup>3</sup> ve'em tse'e ni pana kyavinmama'atut ku ve'e je tsaachpaatun mtukje'yajadat, kux mnuja'vidup xa miitse'e jets xyaktsaachpaatumdape'e je jayu ku ve'e je Cristo mpanajkxumda. <sup>4</sup> Ku aatse'e nve'na miits maatta, nvaajnjidu tse'e jets xyaktsaachpaatumdape'e je jayu. Ax ve'em tse'e tyoojnji kyojtsji, ax jo'n xnujávada jo'n. <sup>5</sup> Ax je'e kajx tse'e ku atse'e nkajot'amaji, je'e kajxts ats miitse'e ntuknukejxti je Timoteo, ve'emts aatse'e nnujávát pan vintso miitse'e jem m'itta je mjaanchja'vin kajxta, kux je'e atse'e nvinmaay ku ve'e to'mayji je Satanás kumyakvinmama'tjidi jetse'e ve'em kuvvyintoki juu' aatse'e ntoon nkojts.

<sup>6</sup> Ax ta tse'e je Timoteo vyimpijtnuva, je'ets atse'e xvaajnqip vintso miitse'e jem mnaajk'ítjada je jaanchja'vin maat jets je tsojkun maat, ve'em tse'e vya'añ jets xoonduk aaj xoonduk joot ats miitse'e xxa'majaa'myétsta jets ooy atse'e xtun'ixuva'anda, nay ve'empa ax jo'n ats miitse'e n'ixuvaanduva. <sup>7</sup> Ax je'e kajx tse'e, utsta ajchta utsta tsá'ada, óyam aatse'e ntsaachvinmaajy jets aatse'e je jayu xyaktsaachpaaty, jot'amájits aatse'e kux nmuja'vip aatse'e jets to'k aaj to'k joote'e xjaanchjávada je Jesucristo. <sup>8</sup> Ooy aatse'e ntunxoonduk kuxe'e to'k aaj to'k joot m'itta je Maja Vintsán maat. <sup>9</sup> ¡Ka'a aatse'e mpaa'ty vintso aatse'e je Nte'yam nkukojtsjat nujom je xoojntkun kajx juu' aatse'e njayejpp jeja je Nte'yam vyinkujk miits kajxta! <sup>10</sup> Jóvum xaaj

jóvum tsooj aatse'e je Nte'yam nmunoo'kxtuk jets aats miitse'e nku'íxtinuvat jetse'e pu'uk avaada je mjaanchja'vinda y'ítut.

<sup>11</sup> Je Nte'yam, juu' ve'e nTee'imdup, jets je nMaja Vintsánamda Jesucristo, je'e tse'e va'andap jets aats miitse'e najkx nku'íxtinuva.

<sup>12</sup> Je Maja Vintsán tse'e ooy dutunjaa'kyakmáyp dutunjaa'kyakmájap je mtsojkunda juu' ve'e mnayjajepxjudup to'k jado'k jets anañujoma je jayu maat, ve'em ax jo'n aats miitse'e ntsokta. <sup>13</sup> Je Nte'yam tse'e myak'ítjadap to'k aaj to'k joot, va'ajts, jets ka'a ve'e ti tokin maat jem je'e vyinkojkm ku ve'e myiinnuvat je nMaja Vintsánamda Jesús maat nujom pan pan jatye'e jye'eip.

## 4

### *Vintso je Nte'yam dutsak jetse'e je jayu jyoojntykadat*

<sup>1</sup> Uxyam tse'e, utsta ajchta utsta tsá'ada, je Maja Vintsán Jesús kajx xa aats miitse'e nmunoo'kxtukta jetse'e mjoojntykadat ax jo'n aats miitse'e ntuk'ixti, ve'em ax jo'n je Nte'yam dutsak. Ax nuyojk tse'e ve'em xjaa'któndat vintso ve'e ya it ñaxy.

<sup>2</sup> Mnuja'vidup xa ve'e jets ti aats miitse'e ntukpavaandu je Maja Vintsán Jesús kajx.

<sup>3</sup> Juu' xa ve'e je Nte'yam chajkp, ya'ats je'e ve'e: Joojntykada vintso ve'e je Nte'yam yakmaja yakjaancha y'ijtnit. Ka'a tse'e je kats xtukmaatjayéptat je yaa'y je tá'ax juu' ve'e ka púkap mjajeyptup, <sup>4</sup> to'k jado'ke'e dujayéput je ñuda'ax je va'ajts joot maat jets je vintsa'kin

maat. <sup>5</sup> Ka'a tse'e je kats xtukmaatjayéptat je yaa'y je ta'ax kux aamp tooype'e jem mja'vin kajxmda jetse'e mnamyaa'títjadat, ve'em ax jo'n jyátukada pan pan jatye'e je Nte'yam duka'íxada. <sup>6</sup> Ni pana ve'e je y'uts je y'ajch dukamutokintónut ukpu dukavin'aa'nút je'e kajx ku ve'e je kats dutukmaatjayép je y'uts je y'ajch je ñuda'ax. Ooy xa ve'e je Maja Vintsán je tsaachpaatun dutumpum ku ve'e ve'em yaktún je ka óyap, ve'em ax jo'n nvaajnjidi jo'n. <sup>7</sup> Ka je'ep xa ve'e je Nte'yam xtuknuyaaxjimdu jetse'e njoointykimdat je ko'oy joot maat, je'e ve'e jetse'e njoointykimdat je va'ajts joot maat. <sup>8</sup> Ax ve'em tse'e, pan pan xa ve'e dukamajapaamp ya pava'nun, ka je jáyuvaps je'e ve'e kyamajapuump, je Nte'yame'e, juu' ve'e xmo'yumdu je y'Espíritu Santo.

<sup>9</sup> Ax je'e pan vintso ve'e mnachókjadat a'utsta ah'ajhta a'utsta atsa'ada, ka'ats je'e ve'e vyinkopka jetse'e ti ntuknujáyadat, kux viinme'e je Nte'yam mtuk'íxada jetse'e mnachókjadat vimpit atuj, <sup>10</sup> ve'emam ax jo'n xtonda maat nujom je utsta je ajhta maat je utsta je tsa'ada juu' ve'e tsuunidup jem macedóniait y'it jootm. Ax nmunoo'kxtktupts aats miitse'e jetse'e nuyojk mtunjaa'knachókjadat vimpit atuj vintso ve'e ya it ñaxy. <sup>11</sup> Pakmuk xa ve'e mnaajk'ítjadat jets tonda kakje'e je mtoonk, ve'em ax jo'n ntukpavaandi jo'n, <sup>12</sup> ve'em tse'e mvintsa'agajadat pan pan jatye'e dukajaanchja'vidup je Maja Vintsán jetse'e ve'em xkatukjoojntykadat juu' ve'e je viijnk jayu jye'e.

*Ku je Maja Vintsán myiinnuvat*



13 Utsta ajchta utsta tsa'ada, ntsajkp xa aatse'e jetse'e xnujávadat vintso ve'e jyaty je jaanchja'vivatajk juu' ve'e aa'kanda, ve'em tse'e mkatsaachvinmáydax ax jo'n je'eda pan pan jatye'e dukah'a'ixtup je Jesucristo. 14 Kux ve'em ax jo'n njaanchja'vimda jets uk'oo'ke'e je Jesús jetse'e jyoojntypajknuva jado'k nax, nay ve'empa tse'e njaanchja'vimda jets je Jesús kajxe'e je Nte'yam duyakjoojntypajknuvat jado'k nax je jayu pan pan jatye'e manaxy ijtup jetse'e y'itta je Jesús maat.

15 Je'e kajxts aats miitse'e nnaajmada je Maja Vintsán je y'ayook kajx, jets pan nuvinxupe'e njoojntykimda van'it ku ve'e je Maja Vintsán myiinnuvat, ka'ats uu'me'e nmaatnavyaatumjadat je Maja Vintsán too'vajkp jetse'e ux'ook dumaatnavyaa'tjadat je jaanchja'vivatajk pan pan jatye'e aa'kanda. 16 Kux viinme'e je Maja Vintsán kyadaaknit ku ve'e jem tsapjootm choo'nut, je kutojkun maat tse'e kyótsut, je ángeles juu' ve'e dunuvintsanikajxp je aangelestajkta, je'e tse'e kótsup, xo'oxup tse'e je Nte'yam je tryompeta, van'it tse'e jyoojntypajktinuvat too'vajkp pan pan jatye'e to'k muk ijtup je Cristo maat ku ve'e y'oo'ktini. 17 Ax ux'ook tse'e, nuvinxupe'e njoojntykimda van'it, xyaktsoo'numdinup tse'e jem vínuts jootm maat je'eda pan pan jatye'e aa'kanda jetse'e nmaatnavyaatumjidinit je Maja Vintsán jem poj jootm, ve'em tse'e n'ijtumdinut maat je Maja Vintsán xa'ma kajx. 18 Ax ya'a kajx tse'e, naajkjot'amájajada to'k jado'k maat ya kats ya ayook juu' ats miitse'e tuntuknujáyada.

## 5

<sup>1</sup> Utsta ajchta utsta tsa'ada, ax je'e pan vinxupe'e ya it jyaa'knaxut ukpu ti ve'e too'vajkp tonjup kotšjup, ka'a tse'e vyinkopka jets ats miitse'e nnujáyadat, <sup>2</sup> kux va'ajtse'e xnujávada jets je xaaj ku ve'e je Maja Vintsán myiinnuvat, ve'emts je'e ve'e myínut ax jo'n je mee'tspa jye'ya koo'ts, van'it ku ve'e je jayu kavinmaapp vye'nat. <sup>3</sup> Ku xa ve'e je jayu vya'anut: “Ka'a xa ve'e ti muvaampa tso'oxpajkpa, oy jootle'e ntsuunimda”, van'it tse'e tun to'mayji je vintókiyun tyukje'yajadat, ve'em ax jo'n je pajkpa je aampa tyukje'yaja je ta'axtajk ku ve'e je y'onuk duyakke'exuva'añ, ax ka'a tse'e y'oya jetse'e dukuke'ektat. <sup>4</sup> Ax miitsta, utsta ajchta utsta tsa'ada, ka'a tse'e ve'em m'itta ax jo'n je jayu juu' ve'e tsuunidup kupi'ijts kukoo'ts, ka'a tse'e kavinmaapp mve'nadat je xaaj ku ve'e je Maja Vintsán myiinnuvat. <sup>5</sup> Ve'em xa miitse'e anañujoma m'itta ax jo'n je jayu juu' ve'e tsuunidup jeja ajajtk it jaat; ka'a xa ve'e n'ijtumda ax jo'n je jayu juu' ve'e tsuunidup kupi'ijts kukoo'ts. <sup>6</sup> Je'e kajx tse'e, va'an tse'e dunaajk'ijtumjada joojntyk jets viji kej, apaamduka ve'e n'ijtumdit van'it paat ku ve'e je Maja Vintsán myiinnuvat, ka'a ve'e ax jo'n je viijnk jayu juu' ve'e dukah'apaajmtkidup. <sup>7</sup> Je'e pan pan jatye'e ijttup ax jo'n je jayu juu' ve'e tsuunidup kupi'ijts kukoo'ts, ve'emts je'e ve'e y'ijttuva ax jo'n je jáyuda pan pan jatye'e makk maadup. Je'e pan pan jatye'e ooktup mookjudup, jeja tse'e akoo'ts it jaat y'oo'kta myo'okjada. <sup>8</sup> Ax pan nuvinxup tse'e n'ijtumda ax jo'n je jayu juu' ve'e tsuunidup jeja ajajtk

it jaat, va'an tse'e dunay'akuvaa'nimjada, va'an tse'e dunaajk'ijtumjada ax jo'n to'k je tojpa juu' ve'e naajk'ijtjup apaamduka. Ve'em ax jo'n je tojpa mak̄k ñaajk'ítju ku ve'e tuñatyukxaxju je poxxun xox, ve'em tse'e dutsak jetse'e mak̄k njaanchja'vimdat je Nte'yam jetse'e ooy je tsojkun ntunjayejpumdat. Jets ve'em ax jo'n je tojpa ñapya'muxju je poxxun kujop, ve'em tse'e dutsojkpa jetse'e apaamduka n'a'ixumdat je Cristo ku ve'e myiinnuvat jetse'e xyaktsookumdinit. <sup>9</sup> Kux ka je'ep xa ve'e je Nte'yam xtuknupaajmtkimdu jetse'e ntsaachpaatumdinit xa'ma kajx, je'e ve'e jetse'e njayejpumdinit je joojntykin juu' ve'e xa'ma kajx ijtp je nMaja Vintsánamda Jesucristo kajx. <sup>10</sup> Je'e kajx xa ve'e je Jesucristo xku'oo'kimdi jetse'e nmaatjoojntykimdinit xa'ma kajx, pan joojntykimdupe'e uk pan aa'kanda ve'e. <sup>11</sup> Je'e kajx tse'e, naajkjot'amájajada jets nakyojtsmákkajada to'k jado'k, ve'em ax jo'n xtonda.

*Ku je Pablo dukojtsji je utsta je ajhta maat je utsta je tsa'ada*

<sup>12</sup> Utsta ajhta utsta tsa'ada, nmunoo'kxtktup xa aats miitse'e jetse'e xvintsa'agadat pan pan jatye'e toondup miits maatta, pan pan jatye'e mnuvinténijidup je Maja Vintsán kajx jetse'e mkojtsuxjada je Nte'yam jye'e. <sup>13</sup> Mjávadap mtsóktape'e ooy je'e je tyoonk kajxta. Naajk'ítjada oy joot to'k jado'k.

<sup>14</sup> Utsta ajhta utsta tsa'ada, nvaajnjidupts aats miitse'e jetse'e xtuknaajmadat je'e pan pan jatye'e

nooxtsuunidup. Kojtsjot'amájada je'e pan pan jatye'e jotmootsk ijttup. Putákada je'e pan pan jatye'e duka'oynuja'vidup je Nte'yam je y'ayook. Muténada vintso ve'e to'k jado'k je jyáyuvinda.

<sup>15</sup> Ixta jets ni pana ve'e dukatukkuvétut jado'k pan vintso ve'e je ka óyap tutyo'nuxju, ñojk'óye'e xa'ma oy jayu mnapyámjadat to'k jado'k jets anañujoma je jayu maat.

<sup>16</sup> Xa'ma kajx tse'e mxoonduktat. <sup>17</sup> Ijtp tse'e mtsapkótstat. <sup>18</sup> Kukojsjada je Nte'yam pan ti ve'e toojnup kojtsjup, kux je'e ve'e je Nte'yam chajkp jetse'e xtóndat xkótstat ku ve'e m'itta to'k muk je Cristo Jesús maat.

<sup>19</sup> Majapamda juu' ve'e je Espíritu Santo mtuknuja'vijidup. Pan ka'a tse'e ve'em xtonda, mákk tse'e vyimpítut je mja'vinda jetse'e xkakuváktat juu' je'e ve'e kyajtsp. <sup>20</sup> Ka'a tse'e xko'oyjávadat juu' ve'e mkojsuxjudup pan pan jatye'e vaandup jets je Nte'yam je y'ayooke'e kyojtsnajxtup. <sup>21</sup> Payo'oyda oy juu' jatye'e kyojtstup. Yaktanda jem mja'vin kajxmda je y'oy je'e juu' ve'e kyojtstup; <sup>22</sup> ka'a tse'e xkuváktat je kyoy je'e juu' ve'e kyojtstup.

<sup>23</sup> Je Nte'yam, juu' ve'e je oy joot duyajkp, je'e tse'e myak'ijtidinup oy jets va'ajts, je'e tse'e nujom je mjootta je mja'vinda duyak'ijtnup jets nujom je mni'kxta je mkopkta, ve'em vintso ve'e ni ti tókina mkapaatuxjadat. Ve'em tse'e dutónut van'it paat ku ve'e myiinnuvat je nMaja Vintsánamda Jesucristo. <sup>24</sup> Je Nte'yam, juu' ve'e myaaxuxjudu jetse'e dukutyún juu' ve'e kyajtsp, je'e tse'e myak'ijtidinup oy jets va'ajts.

*Ku je Pablo kyojtskukajxini*

<sup>25</sup> Utsta ajchta utsta tsa'ada, nʉtsapkotsta aats to'k aaj.

<sup>26</sup> Nachee'njada to'k jado'k je tsojkun maat je Maja Vintsan kajx.

<sup>27</sup> Jeja ats miitse'e je Maja Vintsan vyinkujk ntukpava'anda jetse'e xtukvinkotsadat ya nak anañujoma je utsta je ajchta maat anañujoma je utsta je tsa'ada.

<sup>28</sup> Je nMaja Vintsanamda Jesucristo tse'e mkunoo'kxjadap.

**Ya'a tse'e je nam kojstán juu' ve'e je  
Nte'yam\_ xyaktaajnjimdu je nMaj  
Vintsánamda Jesucristo kajx  
New Testament in Mixe, Totontepec (MX:mto:Mixe,  
Totontepec)**

copyright © 1989 Wycliffe Bible Translators, Inc.

Language: Totontepec Mixe, (Mixe, Totontepec)

Translation by: Wycliffe Bible Translators, Inc.

Mixe, Totontepec [mto], Mexico

**Copyright Information**

© 1989, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixe, Totontepec

**© 1989, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 21 Feb 2024 from source files dated 29 Jan 2022

47d09f80-22d6-55c5-b9e5-a04a59e3169e